

TEZAU LITURGIC
24 IANUARIE

ACATISTUL
SF. MUCENIC
IOAN
DE LA KAZAN



MOSCOVA, 2000



Акафист святому мученику Иоанну Казанскому

Кондак 1

Избранный чудотворче и угодниче Христов, града нашего предивное заступление и ограждение, восхваляем тя любовью, мучениче Иоанне: ты же яко имеяй дерзновение ко Господу, от всяких бед и скорбей свободи зовущих: радуйся, святой Иоанне, мучениче Казанский и чудотворче.

Икос 1

Ангела пред Собою народу Божию Пославый избра тя, всехвальне мучениче Иоанне, яко да возвестиши во граде Казани житием своим скорое торжество веры православныя. Мы же ныне, имуще тя яко перваго предстателя, зовем ти:

Радуйся, измлада Господа возлюбивый;

Радуйся, до конца верность ему сохранивый;

Радуйся, граду нашему Богом данный покровителю;

Радуйся, бед и скорбей от жителей его прогонителю;

Радуйся, ангельским ликом сопричтенный;

Радуйся, в броню веры Христовой облеченный;
Радуйся, мученических полков украшение;
Радуйся, вся Поволжская земли утверждение;
Радуйся, святой Иоанне, мучениче Казанский и
чудотворче.

Кондак 2

Видя Христос Бог наш зловерных казанцев
беззакония, избра ты, святой Иоанне, яко да
струями кровей твоих чистейших нечестие
агарянское угасится, и по времени тех посрами.
Мы же, зряще величие Божие и торжество веры
православная в земли нашей, поем Ему:
Аллилуия.

Икос 2

Разум несомненный имел еси, святой Иоанне,
яко не токмо во одежды ратные облачался еси,
но всего себе Богу повинув, броней праведности
и щитом веры стрелы полков видимых и
невидимых отражал еси. Сего ради поем тебе:
Радуйся, от юности твоея всего себе Богу
предавый;
Радуйся, от Него прославление приявый;
Радуйся, воине Христов непобедимый;
Радуйся, проповедниче от Господа призванный;
Радуйся, молитвенниче к Нему неустанный;
Радуйся, страстотерпче добропобедный;

Радуйся, кроме страха Божия иного страха не ведый;
Радуйся, святой Иоанне, мучениче Казанский и чудотворче.

Кондак 3

Силою Вышняго укреплен был еси на тесном пути долготерпения и подвига страдальческого, святой мучениче. Мы же зряще тя, яко сосуд избранный во еже послужити Богови и наставляти нас на путь спасения, поем Избравшему тя: Аллилуия.

Икос 3

Имуще волю злую, беззаконнии агаряне землю Русскую терзаху, грады и веси сокрушающе. Ты же, святой мучениче, отечество свое Нижний Новгород яко доблий воин защищал еси. Мы же о граде нашем молитв твоих просяще, зовем ти:
Радуйся, Нижегородския земли прозябение святое и преславное чадо;
Радуйся, стено и ограждение нашего града;
Радуйся, доблестный в защиту веры христианския воителю;
Радуйся, земли своя мужественный защитителю;
Радуйся, яко вражду и злобу кротостию Агнца Божия победивый;

Радуйся, за Него землю нашу кровию
обогривый;
Радуйся, заповедей Иисусовых исполнителю
усердный;
Радуйся, Евангелия Христова хранителю
верный;
Радуйся, святой Иоанне, мучениче Казанский и
чудотворче.

Кондак 4

Бурю внутри помышлений сумнительных имел
еси, чудный Иоанне, егда град твой разорен
бысть ордою Казанскою и ты со множеством
людей в полон уведен был еси, но зря в сем Волю
Божую, на Него токмо уповая, взывал еси Ему:
Аллилуия.

Икос 4

Слышав сродник царя, нечестивый Алей-Шур, о
княжеском ратнице пленном, призва тя к себе.
Ты же не токмо его, но и вся удивил еси
добродетельми и мужеством своим, такожде и
нас, поющих тебе сицевая:
Радуйся, крине, возникший посреде терния;
Радуйся, благоверный воине, иго Христова
подъявый и отвергий зловерие;
Радуйся, кротостию злыя козни победивый;
Радуйся, любвию вражду отмстивый;

Радуйся, магометовой веры твердый
обличителю;
Радуйся, веры в Пресвятую Троицу неотступный
хранителю;
Радуйся, день и ночь к Богу взывавый;
Радуйся, любовь свою к Нему житием своим
показавый;
Радуйся, святой Иоанне, мучениче Казанский и
чудотворче.

Кондак 5

Боготечною звездою от запад на востоки
пронеслся еси, святой мучениче Иоанне, сущих
бо во тьме светом веры Христовой озарил еси,
научая пети Ему: Аллилуия.

Икос 5

Видев тя праведна и незлобива, мучениче
Иоанне, возвыси тя князь агарянский и восхоте
едина по вере тя зрети. Ты же, ведая путь
истинный, ведущий в живот вечный,
непоколебимо в вере Христовой пребыл еси. Мы
же зовем ти:

Радуйся, звездо пресветлая христианского
благочестия;
Радуйся, посрамителю агарянского нечестия;
Радуйся, любовь Христову в сердце имевый;
Радуйся, веление Его неведущих презревый;

Радуйся, смирением духов злобы победивый;
Радуйся, огнем молитвы стрелы вражия
попаливый;
Радуйся, злобы неверных не устрашивыйся;
Радуйся, твердым защитником веры истинныя
явивыйся;
Радуйся, святой Иоанне, мучениче Казанский и
чудотворче.

Кондак 6

Проповедник веры истинной явился еси, святой
мучениче, пред сыны агарянскими. Христа бо,
Сына Божия, яко едино спасение проповедал
еси, словесы богомудрыми и житием
непорочным научая неведущих пети Ему:
Аллилуия.

Икос 6

Воссиял еси во агарянском граде благочестием и
мужеством своим, чудный Иоанне, и победил
еси до конца злыя напасти и козни кротостию и
постом, смирением и молитвою. Буди и нам
образ в сих посреде мирских треволнений и
диавольских искушений, поющим ти:
Радуйся, свете, воссиявый из тьмы греховныя;
Радуйся, образе жизни духовныя;
Радуйся, слезныя молитвы к Богу приносивый;
Радуйся, всею душею Его возлюбивый;

Радуйся, злочестия магометанскаго обличителю;
Радуйся, закона Господня теплейший
хранителю;
Радуйся, от враг видимых и невидимых стено и
ограждение;
Радуйся, прелюбимое и верное скорбящим
утешение;
Радуйся, святой Иоанне, мучениче Казанский и
чудотворче.

Кондак 7

Хотяще уклонити тя от веры Христовой, святой
мучениче, ничтоже возмогоша зловернии
казанцы ласками ни угрозами, ниже
истязаньми. Ты же, ложное их учение обличая,
истинного Бога – Господа нашего Иисуса
Христа, всем проповедал еси, непреложно
взывая к Нему: Аллилуия.

Икос 7

Новаго тя зрим воина Царя Небесного
непоколебима и Христа неуклонно до конца
проповедавши, за Него бо не токмо полон
долгий, но и мраз, и чрева прободение и главы
усечение претерпел еси, мучениче Иоанне. Мы
же поем ти таковая:

Радуйся, языческую прелесть обличивый;
Радуйся, силою Креста врага победивый;

Радуйся, глад, биение и мраз лютый за Христа претерпевый;

Радуйся, на усечение главы за веру правую с радостию изшедый;

Радуйся, во страдании своем доблесть чудную явивый;

Радуйся, славный проповедниче Православия;

Радуйся, и по смерти в молитвах нас не оставивый;

Радуйся, святой Иоанне, мучениче Казанский и чудотворче.

Кондак 8

Страшное видение помышляюще, како ярости исполнишася на тя нечестивии и прещаху ранами усеци ти главу, восхваляем Господа всех, яко чудодейственно сохранил еси тя жива, святой Иоанне, дабы усты твоими поведал еси о страданиях своих. Темже поем Ему: Аллилуия.

Икос 8

Весь бе кровьми истекая, на малых жилах держа честную главу десницею, шуйцею же покрывая наготу свою, вшел еси, святой мучениче, во град к послом великого князя Московскаго, поведавая им о тебе бывшая. Мы же терпению твоему дивящися, зовем ти:

Радуйся, от неверных за проповедь веры истинных ятый;
Радуйся, мечем усеченный за Христа Распятого;
Радуйся, терпением сонм мучителей посрамивый;
Радуйся, подвигом своим христиан возвеселивый;
Радуйся, Божественных службы пламенный любителю;
Радуйся, до конца взывавый ко Христу Спасителю;
Радуйся, в правоверии стоящих незыблемое утверждение;
Радуйся, во благочестии ходящих крепкое ограждение;
Радуйся, святой Иоанне, мучениче Казанский и чудотворче.

Кондак 9

Слышавше твое исповедание, людие посольстии дивляхуся о тебе бывшему, дивный Иоанне, и, яко зряще еще жива тя, святого мученика и исповедника, прославляюще Бога воспеваху Ему: Аллилуия.

Икос 9

Ветии многовещаннии не изрекут по достоинству многочисуднаго жития твоего, святой

Иоанне, мы же, дивящися преславному величию Божию и чудесем Его, о тебе бывшим, поем ти сими похвальными словесы:

Радуйся, всем сердцем Иисуса Сына Божия возлюбивый;

Радуйся, дивным от Него спасением зверство мучителей победивый;

Радуйся, к сонму мучеников сопричтенный;

Радуйся, Трисиянным Светом озаренный;

Радуйся, страдания в радость обращающий;

Радуйся, малодушия нас избавляющий;

Радуйся, унывающим благодатное ободрение;

Радуйся, изнемогающим внезапное укрепление;

Радуйся, святой Иоанне, мучениче Казанский и чудотворче.

Кондак 10

Спасти хотя до конца душу твою, упросил еси пресвитера все дневное правило отпети и, прияв Пречистаго Тела и Крови Господа нашего Иисуса Христа, всю ночь со слезами молился еси, наутрие же предал еси душу в руке Божии, до самыя кончины взывая к Нему: Аллилуия.

Икос 10

Стены новыя обители Успения Богородицы повеле царь Грозный воздвигнути на Зилантовой горе, юже напоил еси кровьми

своими и идеже погребен был еси, мучениче
Иоанне. Мы же, молитв твоих о ней просяще,
поем ти сицевая:

Радуйся, Богом данный нам покровителю;

Радуйся, бед и скорбей от нас прогонителю;

Радуйся, чтущей ты обители неусыпный страже;

Радуйся, крове твоея излианием гору Зилантову
освятивый;

Радуйся, молитвами ко Господу град наш
оградивый;

Радуйся, яко тобою дивен Бог во святых Своих
является;

Радуйся, яко тобою благочестно имя Христово
прославляется;

Радуйся, святой Иоанне, мучениче Казанский и
чудотворче.

Кондак 11

Пение тебе приносим, досточудне Иоанне, аще и
не зрим многоценных мощей твоих, обаче вемы
Тя великаго чудотворца и молитвенника за ны у
престола Божия, идеже со всеми святыми
воспеваеши Ему: Аллилуия.

Икос 11

Светоприемную свещу воздвиже ты Господь,
святой мучениче. Обитель бо, идеже ты под
спудом пребываеши, велий свещник явился над

градом нашим. Ты же чудесы с него сияеши и освещаеши его и молиши Христа Бога о воспевающих ти:

Радуйся, граде, верху горы стоящий;

Радуйся, светильниче, любовью Христовою горящий;

Радуйся, столпе веры, бронеею правды облеченный;

Радуйся, воине земный, к воинству Небесному сопричтенный;

Радуйся, житием Ангелы и человеки удививый;

Радуйся, древних мучеников и исповедников возвеселивый;

Радуйся, земли Казанския благодатное осенение;

Радуйся, всем нам прибежище и заступление;

Радуйся, святой Иоанне, мучениче Казанский и чудотворче.

Кондак 12

Благодати тезоименитаго и Предтечи Своего смерти подобника яви тя Господь, мучениче Иоанне, и тобою предвозвести Светом Своим просвещение града нашего. Сего ради поем Богу: Аллилуия.

Икос 12

Поюще многострадальныя подвиги твоя за Христа, славне Иоанне, хвалим долго-терпение твое, ублажаем мученическую кончину, почитаем и священную память твою, покровителю наш и заступниче, и в похвалу тебе поем сицевая:

Радуйся, града Казани похвало и утверждение;

Радуйся, обители Богоматерния присное заступление;

Радуйся, стен ея твердое и нерушимое основание;

Радуйся, в ней подвизающимся и молящимся упование;

Радуйся, яко страдания твоя в храмах Божиих величаются;

Радуйся, яко молитвами твоими козни бесовския расточаются;

Радуйся, мученическаго воинства украшение новое;

Радуйся, светозарное светило Церкви Христовой;

Радуйся, святой Иоанне, мучениче Казанский и чудотворче.

Кондак 13

О всехвальный мучениче Иоанне, милостивно прием сие малое моление наше, умоли главу

змиеву сокрушившаго Христа Бога нашего, Егоже ради мучения приял еси и усечением главы убиен был еси, да избавит нас от всех скорбей и напастей в жизни сей, в вечней же сподобит Царствия Небеснаго, идеже вкупе с тобою воспоем Ему: Аллилуия.

Этот кондак читается трижды, затем 1-й икос и 1-й кондак

